

泰定養生主論

泰定養生主論卷之三

趙大綱莊子撰

素問節要叙論

墳素之書聖聖相傳歷代所尚輔教濟生其道大明
於天下學者厭於研窮方書充塞乎世間好事者溺
於苟且於是目擊無端之蔽獨夜蕭蕭愈昏愈昭而
心口相喻曰雖醯雞蠅蠓之微亦能聚形接翅於大
空之中而鼓舞造化之妙況我齒髮之屬而無寸補
於天地之間得無愧乎故推管見以陳其畧誠非專

門之學是必行不由徑復獲難素照對或有未盡之
義各入全文一段譬如偃蹇之風雖不能使萬籟俱
鳴或可蕩滌乖穢而道達靈氛耳倘能階麓以入細
則岐黃之奧期日可得也養生之家不可不知如從
事於斯者遠取諸物近取諸身博覽群書約歸於理
朝於是夕於是精思熟察慈應廣惠疑證勿鑿重病
勿避進不以私退不以慚終身期於古人並駕而無
耻惡衣惡食冠冕倘來來則受得時行道普施群靈
不亦大丈夫乎若夫不下克己工夫先競鬪勝負
胸中茅塞口耳聰明鋪贍岐黃之風網羅龔瞽之利

及乎對證生疑則慰之以開胃補虛偷安苟幸取媚
人情實實既爾病勢漸危患家感其過從而沒齒無
恨醫者自以爲穩而反有德色常態如此識者爲之
慘然或素無受授之資剽竊單方輕行峻劑不顧虛
虛蓋虛虛實實損不足益有餘正犯醫經之條歟冒
昧旣久遂成忍人或怪形異服行頭擊帳雖小夫賤
隸皆得爲之醫之爲道從此下矣由是士大夫耻言
醫術士大夫耻之余亦耻之也嘗聞士大夫以一物
不知爲耻而不敢醫則不亦耻乎捨至親者身而
榮至疎者名及惟痼疾則頓委於庸人之手悲夫趨

趙嘏嘯之榮樹塞反玷之僭君子是謂斗筭未聞以
醫而害名者也與其託興於婉辭綺語之間游戲於
翰墨博弈之事則未若留心斯道以事君親若不明
其梗槩而命醫者曰吾抱某病當服某藥是教玉人
雕斲也苟聽其命則合合則未免爲奴顏婢膝之悞
不合則取短舍長而有道者飄然矣余曩因多病漸
染成習故稔知憂患情況頗究醫學淺深岐伯曰病
爲本工爲標故首論病家次論醫家欲病者安養醫
者安行各祇乃事次正訛公論則取其是去其非而
通治異治可用不可用其理自明然後運氣標本陰

陽虛實脉病證治次第十卷盖六氣如醫者之司屬也標本如事之先後也陰陽如事之彼此也虛實如事之可否也診脉乃醫者之審委也故百病所屬之氣如網之在綱對病處方則如綱之於網而理明證定治乃無誤矣不然則如東坡跋楞伽經云譬如里俗醫師不由經論直授方藥以療病非不或中至於遇病輒應懸斷死生則與知經學古者不同日而語也其是之謂歟

論病家

原夫天地之靈爲陰陽之神而人心之靈爲血肉之

神也其體不同而其神不異故人之心也與天地合其德與日月合其明以口體所累則或勞心或勞力而爲治人事人之所役也致昧其德與明也血肉之軀安得無病夫鳥獸亦血肉也巢居穴處飽而後已則未聞其有病而馬牛鷹鷂亦鳥獸也以其轡繫在人乃亦有病焉然而人之情也可謂甚矣鳥獸習其習而病況其傾天下之色不足止其欲徧天下之財不足愈其貪名韁利鎖麴蘖輕肥富貴者過之貧賤者不及其情可勝言哉及其病也嗜好不能瘳其疾情慮不能使其安故當遷善改過息滌返神則藥餌

易效重病卽輕而輕病卽愈也人之百病其義有五
一曰稟受之病與生俱生者是也二曰果報之病伯
牛之癩袁盎之瘡者是也三曰六淫之病風寒暑濕
燥火外邪所侵者是也四曰七情之病喜怒哀樂憂
恐思者是也五曰金瘡顛撲外傷者是也外傷等證
顯而易曉其所謂七情者責當在誰六淫則亦以此
而召之耳況其果報之病前生今世莫非我乎若覺
之早也故袁盎遇鷄足山尊者而釋其冤西施山居
癩愈而成九女之容不然則醫如扁鵲之才亦望齊
侯之疾而却走矣其與生俱生之病評亦父母之源

流也其可盡除之乎今之宦門巨室務要便佞藥須
香其事必如意稍聞逆耳之言則必遷怒於人故仲
景傷寒論序云方今居世之士但競逐榮勢企踵權
豪孜孜汲汲惟名是務崇飾其末而棄其本華其外
而悴其內皮之不存毛將安附焉卒然遭邪風之氣
嬰非常之疾患及禍至而方震慄降志屈節欽望巫
祝告窮歸天束手受敗實百年之壽命持至貴之重
器委付凡醫恣其所措呻吟嗟嗚呼厥身已斃神明既
遷變爲異物幽潛重泉徒爲啼泣痛夫舉世昏迷莫
能覺悟不惜其命若是輕生彼何榮勢之云哉而進

不能愛人。知人退。不能愛身。知己遇災。值禍。身居厄地。蒙蒙昧昧。蠢若游魂。忘軀徇物。危若冰谷。至於是也。孫真人曰。嵇康云。穰歲多病。饑歲少疾。信哉。不虛。是以關中土地。俗好儉嗇。厨餼殺餼。不過菹醬而已。其人少病而壽。江南嶺表。其處饒足。海陸鮮。殺無所不備。土俗多疾。而人早夭。北方士子。游宦至彼。遇其豐贍。以爲福祐所臻。是以尊卑長幼。恣口食噉。夜長醉飽。四體熱悶。赤露眠卧。宿食不消。未逾朞月。大小皆病。或患霍亂。脚氣脹滿。或寒熱瘧痢。惡核丁腫。或癰疽痔漏。或偏風瘖蹇。不知醫療。以至於死。凡如

此者比肩皆是惟云不服水土者不知得病之由靜
言思之可太息者也是故醫書云富貴之人從生
至長無敢逆其意者及其病也亦然故曰難治况夫
閭閻之家不諳服餌投藥米幾或證當傳變或藥病
相攻便言有隔卽從事乎異端不根之說而中道而
廢明明易治之病翻成不救之危大抵暴病不可荏
苒沉痾不可速瘳欲速則更醫必驟醫衆其論必繁
荏苒則邪氣入深用藥未必卽差故可以急則急可
以緩則緩至誠待士則賢者進而不肖者退也至乏
醫之處必也擇其謹愿者從其所長而用之若求奇

信勝則市井之風起矣且醫人臧否各有聲迹觀其所由察其所安則人焉廋哉蓋昧理之士劑繁而語雜明理之士劑簡而論詳昧理之士自求進退則慚明理之士不奔趨敬而直入門不問證切脉便知源然後問之聞之望之參之六經內外無差按藥卽有寸進故知其可用也然進之效亦有說焉藥病相投時間似愈病勢進退當論後先若事游談泛論竊聽旁人廣引方書誣合轉變舉措詭譎情懷鹵莽暴病難愈久患轉增者故知其不可用也然而轉增之病亦有說焉如藥病相攻則時間反倒不日病痊又在

人消息且富貴之人有病則薦醫者多而進者雜主
病之人悅同好局見聞去取不公則病者之不幸也
孫真人云大家有病用醫切不可令真偽一處藥味
中間防有差迭可不慎乎

論醫家

孔子曰學也祿在其中矣人之託身從事業雖不同
貴賤溫飽皆可謂之祿未有求祿而不學者也况醫
者之學藝兼尤流其學豈有窮極哉世俗云學醫費
人命雖出戲談不可不戒孔子曰知之爲知之不知
爲不知是知也故當臨病用藥則度吾所長而爲之

難明之證則退而思之幸而得之則當勇於義不顧
冒昧強爲網羅世利聖人之道贊成化育豈爲區區
細人作無厭之計哉故曰醫者人之司命任大責重
之職也凡當臨病之際不見其貴賤親疎但自知
病證治義然後取尚嫌有心况可作色用情需以
帛帳彩乎一懷利心則進退惑亂也求醫之急
解倒懸一時輕諾未免寡信孰若止吾之心術
之定見其道之大行也則心亦如是其道之不行
則心亦如是榮枯得失定以天緣公伯寮其如命
古者稱醫爲師今也視醫如戲孔子所謂夫人必

侮然後人侮之又曰機也慾焉得剛是故人能剛
慾者必不爲此俗態也經目之事既驗紀錄之文已
明孫真人惠及昆蟲休官學道而隱顯神仙聶從惠
醫逢姪婦誠意存仁而子孫仕宦或因醫行姪或
傷胎孕鬼神之禍定業難逃仲景書云陰陽虛實之
交錯發汗吐下之相反醫術淺狹爲治乃誤使病者
殞歿自爲其分至今冤冤塞於冥路死屍盈於曠野
仁者鑑此豈不痛歟又曰智者之舉措也常審以慎
愚者之動作也必果而速安危之變豈可詭哉此古
人之告戒至切者學者甚勿忽之嘗見醫者診脉不

識寸關放手妄言虛實不問得病之由今經幾日是
表是裏曾無傳染只據所見便言其證證且未的不
顧汗下次第或病人勞復便毀前醫爲誤甚至子談
父過者有之弟掩兄長者有之及其治療本無所長
原其所以則志在於利前人有言曰醫人乘急取財
者甚於盜賊且莊子曰盜賊亦有仁義禮智信今也
廢其天倫而公懷奪榮利則不若盜賊矣是可忍也
孰不可忍也以余觀之欲得榮利甚不爲難學而思
之安而行之天爵厚薄甘吾分而自然足矣嘗聞蜀
人通真子註叔和脉經已行於世而其道未行遂歷

湖漢江浙亦未有目之者及至淮之邵伯鎮旅于僧舍亦然無聞於人又將顧而之他主僧聞之曰子若不設肆人誰之知市有寺屋吾給予器具請試爲之旣而醫道大行妻子具而家產豐一日主僧將他召其來前密語曰子前生在此鋪街繫井今享此報更宜積德他生後世又非今日之比也言訖而化是知學者未有不遇無學者遇之無術以濟人則誤傷惡行之報緣盡當償古語有云醫不三世勿服其藥蓋讀伏羲神農黃帝之書非獨三世爲醫也傳業之子不可恃爲家學而守死寡聞悞已不妨人命爲重賢

賢易色不耻下問尚恐不及况是已非人乎口給之才足以欺人不足以欺天蓋實學在乎貫穿該博深涵厚蓄得魚忘筌得兔忘蹄則自然其用不繁而履踐閑雅也歌誦難素記問之能也圓散精妙脩合之能也湯液生熟煎煮之能也套類加減市貨之能也廣收博聚料劑之能也輕財尚義濟利之能也乃至於博覽群書深明本草皆醫之事非醫之道夫何故蓋天下紛紛之事理一而已明諸理而學醫則思過半矣天下昏昏之情因果而已明諸心而行醫則其過蓋鮮矣

泰定養生主論卷之二

素定養生主論卷之四

孫太師

撰

正訛

方書云夏月陰氣在內原夫聖人以天地爲法象明
人身之安危天地之氣一歲十二卦一卦六爻共七
十二爻半陰半陽以候二百六十日康節云天根月
窟閑來往三十六宮俱是春蓋陰消陽長暑往寒來
故十一月復卦坤下陽生泉泉卽溫至於正月三陽
陽氣平地故云內陽而外陰及乎四月六陽將盡陰

氣下生則井底寒泉至者七月三陰平地故曰外陰而內陽也天地之氣相去八萬四千里日月週天動經一歲故陰氣在內有三月之爻康節云一物各具一乾坤是則人於天地具體而微心腎之氣相去僅八寸四分元氣週身盤旋百刻故以子爲一陽生午爲一陰生七十二爻半陰半陽盈虛消長比之天地之氣特倏忽耳且盛夏之井可以結冰人而如之則當身半已下三月無陽也其何以爲榮衛乎夫一年卦氣自五月行陰符至七月則爲天地否卦其象陰而外陽人居大地之上與金流石礫均受其氣而

非吾氣衛血榮則立爲焦腐矣所以不焦腐者可見
吾身之天地與其天地義同而體異乎是以善攝生
者吾之天地陰陽無愆則榮衛周密而六淫無自入
也不善攝生者六淫之邪相侵而醫藥之道作矣古
方治伏暑中暍用白朮五苓柴胡益元以墜滲清利
其熱毒也近世好事者穿鑿古人糟粕不明天人小
大例謂盛夏陰氣在內不用寒涼又醫書云春主發
生陽氣在上可行瀉法瀉者吐也冬主閉藏陽氣在
內可行瀉法瀉者瀉也蓋人之血氣本無寒暑因天
地之寒暑而爲舒縮故春以酒家溢飲則雖窮

冬亦嘔噦終宵傷寒家稱大勝則雖盛夏必用硝黃矣且傷寒內熱者必須寒涼今夫夏月安居之人小便尤其赤澁也故養生密法春夏養陽秋冬養陰王太僕註曰春食涼夏食寒秋食溫冬食熱所以調平天人之氣也若耽食沉寒淨底恣食冰鮮腥膾或挑商走販篙子車夫介馳急務之人乘饑飲水食寒傷脾泄瀉霍亂轉筋四肢厥逆嘔吐清水始用薑桂朮附之藥方今世俗平居盛夏例以五苓大順合服之是所謂引賊歸家者也蓋燥熱相從物之性也以其治暑不亦謬乎以此觀之則執經不通者雖不誤

醫亦能誤事據方之士雖或悞中多致誤傷仲景傷寒論一百一十二方小柴胡湯居其一也專主少陽一證而於三百九十七法中凡六十餘法用之清裏解表第一藥也則活人書中戒曰近世多行小柴胡其性寒厥意慮人妄投於六脉遲細表裏無熱者遂使後人是非然而或因好事者增於其書亦未可知養胃湯辛甘燥熱之劑專主內傷生外感風寒之暴證三日已前則可以發表溫中近世士夫庸醫不問日數傳染是表是裏始終服之遂成陽毒而不救或熱厥入深荏苒成瘵者有之醫書云諸痛爲寒

蓋太陽寒水本寒而標熱至於腹痛桂枝加大黃則其可執如諸痛爲寒乎故經云有治其本而得者有治其標而得者故標本先後緩急之活法也近歲夏秋之間酷暑鬱燠人多伏熱痰涎流注脾胃遂爲腹痛方書不載醫者不通便謂感寒遽用烏附薑桂抱薪救火立爲燥卒矣蓋寒熱之義在乎標本經不盡言人不盡義執經爲證紅紫亂朱醫書云寒熱往來頭疼乾嘔胸膈閉腹脇痛小柴胡湯主之或者不拘春夏曾無飲食之傷類云停食感寒卽用薑附治之至於日月之久更醫數四仍曰停食感寒往往如是

故壞證頗多亦有以結核爲瘰癧者指風毒爲脚氣者方書云上盛下虛者是必心腎不交火炎水濫神情煩潰房事陰痿者是也近年不問壯年煩壅或老而氣血未衰纔見痰多耳鳴不解中脘關格卽服僭燥丹藥名曰鎮墜久則陽亢陰消果爲下虛矣醫書以脾爲中州胃乃水穀之海變化五味薰蒸肺經肺氣氤氲週流百脉接續命蒂爲日生之元故平居七日不食則元和逝矣人之有疾則脾不轉輸故不食而不飢但治其病胃氣自回故仲景三百九十七法不言開胃補虛蓋虛其熱復也惟虛寒脫泄病後食

不復常者。可以燂脾。今之病家。貪主醫人。把穩急於
開胃。故經云。舊病未去。新病又來。藥作祟也。標本者。
醫道之法則也。多見醫者。指人之肥瘦爲標本。若然。
則是臆本矣。是何言歟。今人名爲痢者。古方謂之滯。
下滯者。乃不利之義也。今之痢字。古方無之。蓋利者。
不滯之謂。傷寒法中之瀉證也。義旣不明。則用藥大。
有徑庭矣。况道聽途說。無非臆論。謂某人久痢。百藥。
不效。忽日思某物。喫一餐而愈。後人效之多。致強爲。
殊不知其滯下之積。將盡。腸胃之氣已清。脾元頓回。
而一旦思食。故食之而愈也。世人云。回痰勝服藥。莊。

子云既以爲物欲服歸根不亦難乎蓋痰以敗津所
結嚥入脾胃不復爲津矣但毋令遠唾傷氣可也大
凡世俗之傳差誤用藥之士難明蓋傷寒者三日已
前無汗惡寒不惡風傷風者三日已前有汗惡風不
惡寒若不傳經則數日亦然已傳入內者肌膚不熱
亦不惡風寒也壯熱者表裏實熱寒熱者或先寒後
熱或先熱後寒寒熱往來者寒熱間作晝夜無定發
熱者始終無寒有時作熱潮熱者日晡一作依時而
至內熱者小便赤澀舌上白胎表熱者大小便如常
亦不煩渴鬱熱者五內怫勃而不暢骨熱者坐卧如

蒸鼻塞聲重不惡風寒身體不熱不痛者上壅肺實
伏痰氣閉因風因寒因天色陰晴交變濕熱內鬱或
涕唾稠粘而噴嚏或痰涎壅塞而氣急發作日久而
不愈則亦能頭疼身痛自汗惡風寒也特小便多且
頻元與傷風寒異矣舉世不明此證但見鼻塞聲重
俗云傷風或云感冷或云風發古今方書不載其詳
所以學者一例爲人發表而肺氣愈實甚至有成水
腫者有成肺癰者也亦有素稟者或有因風因寒而
然者但無外證者並用清中理肺肺既停痰日久其
氣不能衛護週身故有流汗如雨今人妄名虛汗誤

矣。虛汗乃傷寒病後虛弱動身汗出，不動身者不出也。此實肺壅而然，亦與傷寒自汗義標同而本異，不可發汗重泄真氣也。本草謂石膏者以體質如猪脂膏，手擘可碎，並有束鍼紋。今之所謂軟石膏者是也。寒水石者又名凝水石，水寒而凝，卽爲冰，故其堅白晶潔，狀若明礬。砂之質或有碎之而粒粒大小皆四方者，又名方解石，今所謂硬石膏者是也。又如鷲管石則似鷲翎管，馬牙硝則如馬牙，皆名物之義也。集錢氏小兒方者以未師藥市爲憑，則欠格物矣。雖誤無妨，蓋藥性大同小異，不可不別也。今人謂小便

白濁者爲虛寒蓋虛寒漏精則洩多而滑者是也其少而頻澀而痛者膀胱蓄熱而謂之五淋證也世人云因顛倒而中風乃是因中風而顛倒也中古之世多以鍼砭補瀉榮衛近代罕得正傳故圓散之道大行春秋至漢藥論兩水論升唐宋以來始定以大劑不過五錢用水皆以甌盞故藥劑大小甌盞淺深宜自消息當以一盞爲十分煎去二三分名曰七八分若令用水二盞煎八分者是該一盞八分則誤矣若煎成一盞中八分者藥性過熱而無效也此皆市貨之風以多爲貴服餌之家以少爲嫌世人好衒醫者

趨時習以成風縱一齊人傳之則衆楚人咻之矣蓋訛舛之弊實害養生好事者不可謂古人皆賢而今人皆愚且如方中云狐臭者皆因拔腋下之毛爲穢氣入肺而然試請驗諸腋氣者曾拔腋毛否且肺以鼻爲出入之門百毛孔竅皆爲開闔之應而獨於腋毛竅中入之耶又曰石藥須研極細不然則爲砂淋石藥極細於脩合之法理所當然蓋沙淋自膀胱與溲同出膀胱者溲囊也其蒂著於小腸幽關之次其尿泌而滲之有出而無入也使其有出有入則清濁混矣相襲之謬則愚萬一格物致知者推而廣之則

名正言順而利己利人也

公論

天下之情苦難乎似是而非也聖人之道一以貫之故是是非非爲君子之公論是非非是乃小人之私心明斯二者則廢事成臻斯二者則急務敗夫藥之於病如救頭然俗謬相乘則吾誰適從大抵聖人立言不離金木水火土治病不離溫涼寒熱濕故黃帝問曰醫之治病也一病而治各不同皆愈何也岐伯對曰地勢使然也故東方之域天地之所始生也魚鹽之地海濱傍水其民食魚而嗜鹹皆安其處美其

食魚者使人熱中鹽者勝血故其民皆黑色踈理其
病皆爲癰瘍其治宜砭石故砭石者亦從東方來西
方者金玉之域沙石之處天地之所收引也其民陵
居而多風水土剛強其民不衣而褐薦其民華食而
脂肥故邪不能傷形體其病生於內其治宜毒藥故
毒藥者亦從西方來北方者天地所閉藏之域也其
地高陵居風寒水冽其民樂野處而乳食藏寒生滿
病其治宜灸焫故灸焫者亦從北方來南方者天地
所長養陽之所盛處也其地下水土弱霧露之所聚
也其民嗜酸而食脂故其民皆緻理而赤色其病癰

痺其治宜微鍼故九鍼者亦從南方來中央者其地
平以濕天地所以生萬物也故其民食雜而不勞故
其病多痿厥寒熱其治宜導引按蹻故導引按蹻者
亦從中央出也故聖人雜合以治各得其所宜故岐
伯舉五方之俗發明九州之內高下之宜則一郡之
間郊郭之異也風土寒燠不齊則隨方受氣唯疫癘
時行之有差耳所謂四方之病則處處有之詎可以
辭害義哉蓋道聽塗說疑似之間聖師荅問不可戶
曉假令有人於此病癰瘍疔腫者以東方砭石之法
治之如今之火鍼之類是也病七情內疾者以西方

毒藥之法治之如今之羌活大戟甘遂巴豆砒礞烏
附常山等藥是也病寒積中滿者以北方之法治之
如今之灸是也病癰痺者以南方之法治之如今之
鍼刺是也病痿寒熱者以中央之法治之如今之呼
吸按摩搖筋擺骨者是也所以察病人之勞逸疎密
強弱之法也故王太僕註曰西方北方之有冷病則
以熱方溫方之法而治之東方南方之有熱病則以
寒方涼方之法以療之此卽如經云以熱治寒以寒
治熱以涼治溫以溫治涼之義也故岐伯曰假者反
之此之謂也豈有浮薄之俗不學病幾求水濟火之

急需熱散寒之害動江南北附會聖人所謂天
下之南北執經迷旨誤衆傷生此東家之西爲西家
之東何足以知奧義哉且如江南楊豫之分豈無高
陵山谷河北青薊之野豈無海濱污下養生之士當
一振耳目之新首觀全文一既而出入方宜異治循
環標本後先據仲景扁鵲之通論則知余非好辯也
試舉一二一日有士人聞一醫者之名則疾首人頰
而怒曰此人可殺余將謂其有大惡行也遂從容扣
之則曰惡其瀉人也再詢其所以且知此醫爲人治
傷寒大便七日不通譫妄狂亂法當承氣湯下之或

曰因瀉而死或曰不得瀉而死余卽謂人曰法當下而下之下之而不愈者不可治也下之而不瀉者於醫何罪識者皆曰然也又余嘗過一人官之藥肆長揖就座未久卽愀然謂余曰此人何故但用硝黃余卽領應之徐徐問曰市貨之藥共有幾品醫官曰不過日用常行者耳余歷數大小麻仁圓三黃圓涼膈散碧雪紫雪之類而斯人躍然起座曰此等皆日消貨也余卽一笑而別所謂硝黃集害人耶則宜市貨乎衆不害人耶則臨證用藥必有以也何其人我哉前所謂是非非是小人之私心者是也紫蘇香附氣

藥之不可無者醫書以香附為婦人仙藥而御製熟
水為上品沉香熟水次之近代以來不原本草藥性
而妄加其過名曰耗氣謂某藥泥血某藥是吐藥某
藥泥脾及其自用却稱其德謂本草云能散結氣者
能滋榮衛者能治癰疾者能補虛勞者由是平地風
波而致使病者在再為沉痾札蔡者矣又有一證贅
牙之事不可不知昔有一富貴老人中風日久一日
託相知數輩力有於余既至彼乃見曰流列坐試問
其故則曰十日不得便溲百法無效敢望料理余問
服麻仁圓否主者曰連日所服不下二升矣余笑曰

可謂多乎哉。利藥雖多，內澹而後秘，當用下。駁令作
密兌礪阜莢細末於上，內後部。又令炒鹽研細，用翎
筒挑鹽末吹入水道中。卽時前後皆通，洩如墨汁。糞
似鐵圓，仍有薄糞津津然出，殊未痛快。則中有不悅
者，余見機而變，遂謀脫身。次早，轎馬疊至，哀懇不已。
故再赴患者，以兩手握余兩手於其胸而仰顧，余曰：
某年老身肥，不幸中風，秘鬱幾死，昨以先生之故，稍
寬三分，更乞用情，遲則不濟也。余令患者於市肆取
益元散一小貼，入瞿麥穗一捻，許煎服。未幾，衆醫拂
袖而去。余出於掣肘也，豈得已哉。次早再招，旣至，見

其內人喜曰夜來服藥後得小洩如墨汁半桶許則大便津津之泄卽止洩行瀉佳藥之功也余疾聲應曰不然不然內有結糞阻之非比水瀉證也遂託故辭之次日不去忽甲醫至曰子之飄然誠爲高尚今早患人小腹腫痛舉室無措未免乙醫譖子用滑石性寒而爲冷氣痛也愴惶無以解紛衆醫慚退余卽對甲醫詭罵乙醫曰愚不可及也夫中風便秘大堅大滿內外如灼五實之證備矣寒從何來此乃日前利藥攻透臟腑夜來小便頻通下部空闊則溥薄藥糞驟然注下其間結糞相雜磊塊聚梗於直腸宛轉

不行致使小腹腫痛也甲醫既退乙醫亦至備如甲醫之言予亦如對甲諷乙之說遂扣其所以則曰如子所論果得結蜚三二十塊藥蜚數升恬然無事別議招醫不勝悶抑故來相告遂別此段猥瑣卽非是已非人蓋臨病活法方書不載醫者譏譏患家無斷舛訛錯綜之時未有以明決之者故書其畧以爲不測辯惑之端養生者幸勿以爲常論而忽之也

素定養生主論卷之五

論運氣

運氣者何十幹之五運十二支之六氣也五運也者木火土金水也故氣交變大論篇黃帝問曰五運更始上應天晷陰陽往來寒暑迎隨真邪相傳內外分離六經波蕩五氣傾移太過不及專勝蕪并願言其始而有常名可得聞乎岐伯稽首再拜對曰昭乎哉問也是明道也此上帝所貴先師傳之臣雖不敏往

聞其旨帝曰余聞得其人不教是謂失道傳非其人
慢泄天寶余誠非德未足以受至道然而衆子哀其
不終願夫子保於無窮流於經極余司其事則而行
之奈何岐伯曰位天者天文也位地者地理也通於
人氣之變化者人事也故太過者先天不及者後天
所謂治化而人應之也帝曰五運之化太過何如岐
伯曰歲木太過風氣流行脾土受邪歲火太過炎暑
流行肺金受邪歲水太過少陽火燔燥水泉涸物焦
槁歲土太過雨濕流行腎水受邪歲金太過燥氣流
行肝木受邪歲水太過寒氣流行邪害心火帝曰善

其不及何如岐伯曰悉乎哉問也歲木不及燥乃大
行歲火不及寒乃大行歲土不及風乃大行歲金不
及炎火乃行歲水不及濕乃大行是故運氣有勝復
勝復之作有德有化有用有變變則邪氣居之故非
其位則邪當其位則正邪則變甚正則微當其位者
木運臨卯金火運臨午土運臨四季金運臨酉水運臨
子所謂歲會氣之平也是謂太乙天符非其位者歲
不與會也土運之歲上見太陰火運之歲上見少陽
少陰金運之歲上見陽明木運之歲上見厥陰水運
之歲上見太陽所謂天之與會也一者天會二者歲

會三者運會故大過而同天化者三不及而同天化者亦三故曰無失天信無逆氣宜無翼其勝無贊其復是謂正治熱無犯熱寒無犯寒以平爲期故岐伯曰時必順之犯者治其勝也故犯熱治以鹹寒犯寒治以甘熱犯涼治以苦溫犯溫治以辛涼養生之關繫正於此故曰不知年之所加氣之虛衰虛實之所起不可爲工矣岐伯曰天氣不足地氣隨之地氣不足天氣從之運居其中而常先也夫五運之政猶衡也高者抑之下者舉之化者應之變者復之此生長化成收藏之理氣之常也失常則天地四塞故五運

生歲之紀各有先天後天正化之法太過不及鬱極
乃發各待時而作故曰知其要者一言而終不知其
要流散無窮此之謂也六氣也者風暑火濕燥寒也
上以此六氣而為司天下以此六氣而為司地運居
其中而為天地萬物安危之造化也故天元紀大論
篇黃帝問曰天有五行御五位以生寒暑燥濕風人
有五臟化五氣以生喜怒憂思恐論言五氣相襲而
皆治之終暮之旦周而復始余已知之矣願聞其三
陽三陰之候奈何合之鬼臾區稽首再拜對曰昭乎
哉問也夫五運陰陽者天地之道也萬物之綱紀變

化之父母生終之本始神明之府也可不通乎故物
生謂之化物極謂之變陰陽不測謂之神神用無方
謂之聖夫變化之為用也在天為玄在人為道在地
為化化生五味道生智玄生神神在天為風在地為
木在天為熱在地為火在天為濕在地為土在天為
燥在地為金在天為寒在地為水是故木火土金水
神在其中而命曰少陰君火是為六氣故自歲前大
寒至春分厥陰風木為初之氣春分至小滿少陰君
火為二之氣小滿至大暑少陽相火為三之氣大暑
至秋分太陰濕土為四之氣秋分至小雪陽明燥金

為五之氣小雪至大寒太陽寒水為終之氣而定於四序故曰終期之日周而復始者也居歲運之下而謂之司地歲運之上者謂之司天故辰戌之歲太陽寒水司天太陰濕土在泉卯酉之歲陽明燥金司天少陰君火在泉寅申之歲少陽相火司天厥陰風水在泉丑未之歲太陰濕土司天太陽寒水在泉子午之歲少陰君火司天陽明燥金在泉巳亥之歲厥陰風水司天少陽相火在泉故天之六氣動而不息居於歲運之上故五歲而右遷以應地之五氣蓋大氣不加臨於君火而以六加五則五歲而餘一氣故右

遷加臨相火也故曰上者右行以六菴為一備綴下
者左行以五歲為一周天餘而復會故動靜相召上
下相臨陰陽相錯而變由生也歲運於中位相得則
和不相得則病故治病者必明天道地理陰陽更勝
氣之先後人之壽夭生化之期乃可知人之形氣矣
運氣所主民病治法古方一十六道備載於十三卷
中其所謂以熱治熱無犯司氣以寒用寒無犯司氣
溫無犯溫涼無犯涼之劑也若夫氣春病涼夏病寒
秋病溫冬病熱則當依六氣本標內淫之法治熱以
寒治寒以熱治溫以涼治涼以溫而平之司天之氣

有南政北政之異其詳以具脈論中大抵司天者主
初之氣至三之氣司地者主四之氣至終之氣氣交
互變歲運舉抑或和病上應五星中合五音下應
五穀五味五虫歲物災眚生長化成收藏九宮分野
所向不同災祥各異善推其方如指諸掌岐伯曰身
半已上其氣三天之分也天氣主之身半已下其
氣三矣地之分也地氣主之以名命氣以氣命處而
言其病故上勝而下俱病者以地名之下勝而上俱
病者以天名之天氣主勝地氣主復無勝無復則無
常數病衰迺止且六氣之應六勝也手足厥陰風木

手足少陰君火手足少陽相火手足太陰濕土手足
陽明燥金手足太陽寒水六脉外也與六氣相應則
百病之所屬也故五運之與六氣猶六十四卦之於
八宮也其為要道乎請試論之且以今歲忒定三年
丙寅少陽相火司天厥陰風水在泉言之地氣擾動
風迺暴舉木偃沙飛炎火迺流陰行陽化雨迺時應
火木同德上應熒惑歲星民病熱鬱欬逆嘔吐胸臆
不利頭痛身熱昏憤膿瘡聾瞶血溢衄衄噴嚏呵欠
喉痺目赤善暴死如是諸証悉皆有之特隨方受氣
微甚不同一家一身勞逸強弱之異故大暑前後暑

藥絕市棺木斷行有一村一巷同日暴卒一十七人
少年者目見耳聞數千里之內莫不皆然至於洋海
舟居之人亦不免其災厄况運居二六之氣之中歲
水太過耶害心火民病身熱煩心躁慄是歲也則當
治熱以寒無翼其勝以平為期也或者以熱用熱而
犯司氣以致枉天矣悲夫已上歲時水旱民病藥謬
衆共見聞此當歲司氣之驗也大抵運氣之用假令
太陽司天之歲患者病少陽之證者只以少陽之法
治之余皆倣此於是平運氣之旨醫工日用不可須
臾離也粗工不得其傳遺家莫識斯誤併入此卷用

曉後昆

論標本

標本者猶言枝幹也故素問云氣司天云標在上本在下蓋每歲司天六氣加臨於地之六氣之上也標本之義其用不一有六經之標本者六淫之來者謂之本六經之受者謂之標有化氣之標本者太陽寒水標熱而本寒是亦標在上本在下也陽明燥金不從標本而從乎中也少陽相火標本皆熱太陰濕土標本皆陰少陰君火標陰而本熱厥陰風木不從標本而從乎中也有內外之標本者皮毛血脉肌肉筋

骨謂之標心肝脾肺腎謂之本有醫人病人之標本者以醫人爲標病人爲本有五行制化之標本者風爲標火爲本有脉候之標本者手經爲標足爲本推而廣之則無所往而不在余故言標本者如長短輕重之權衡尺度也讀醫書而不明此則義無以通也治百病而不明此則無以識先後也況乎名實內外彼此之異散見諸書據方之士不得其傳而以爲虛文由是逆從緩急先後之治不能不惑矣惑而不敢妄治則是也而其奈妄治何岐伯曰有其在標而求之於標有其在本而求之於本故治有取標而得者

有取本而得者有逆取而得者有從取而得者故知
逆與從正行無間知標本者萬舉萬當不知標本是
謂妄行夫陰陽逆從標本之爲道也小而大言一而
知百病之害少而多淺而傳可以言一而知百也以
淺而知深察近而知遠言標與本易而勿及此岐伯
之嘆辭也又云先病而後逆者治其本先逆而後病
者治其本先熱而後生病者治其本先熱而後生中
滿者治其標先病而後泄者治其本先泄而後生他
病者治其本必且調之乃治其他病先病而後生中
滿者治其標先中滿而後煩心者治其本人有客氣

有固氣大小不利治其標大小利治其本病發而有
餘本而標之先治其本後治其標病發而不足標而
本之先治其標後治其本喻如所感之病輕而變爲
重則治其標也所感之病重而別增微外之疾則治
其本也病勢進退則標本互施矣

泰定養生主論卷之五

泰定養生主論卷之六

論陰陽

陰陽之義其說有三有陰毒陽毒之陰陽有陰盛陽盛之陰陽有六經表裏之陰陽病在腑者爲表三陽經也病在臟者爲裏三陰經也陰盛陽盛者謂邪在表而惡寒謂之陰盛邪在裏而發熱者謂之陽盛所謂陰毒陽毒者陰毒則絕無一點陽陽毒則絕無一點陰又有陰中之陰者臟受寒邪也陽中之陽者腑

受熱邪也藥性之陰陽者五苦爲陰六辛爲陽鹹味爲陰淡味爲陽又有上陽下陰背陽腹陰寸陽尺陰晝陽夜陰氣陽血陰以通義理之用若夫陰厥陽厥中風風癰等證之陰陽並屬表裏之陰陽也陰陽既明不可不知虛實

論虛實

醫書云虛虛實實損不足益有餘殺人也故虛實之義爲醫工之關鍵繫病者之死生嗚呼流俗之士例以因病不實爲虛而不以因虛而病病者爲實醫書云寒之所湊其氣必虛虛久則實實者言病實也虛

者言衛虛而寒邪湊泊於膚理之間也既而衛氣又不能勝之邪氣傳入乎肌肉之分則其病也實矣故傷寒論云桂枝下咽陽盛則斃承氣入胃陰盛而亡蓋言以汗藥攻裏而以下藥攻表虛者愈虛而實者愈實是以曰當汗而下則死當下而汗則死也故當病實而宜汗宜下者爲人因病不實爲虛而不下不汗可乎攻其實者是救其虛者也若補其虛則是亦實其實矣此據方之士之通患也岐伯曰五虛者死五實者亦死五實者脈盛皮熱腹脹前後不通瞤悶五虛者脈細皮寒氣少泄利前後飲食不入然則前

後若止飲粥可入亦可回生前後不通諸悶者前後
通腹脹減亦可回生其為**法病**痼疾雜病人壯病重
者可攻人壯病輕者易散人弱病輕者易調平人弱
病深者先輕後重而取之標本不相得者已之蓋病
為本工為標議論不合信聽不一則如之何其可也
慎哉

論脉

脉者元和之氣象榮衛之安危也其道具於素問而
其訣明於脉經前聖後賢推論詳悉無非楷式造進
者可以知其大綱又學則庶幾融會故唐人許學士

云思慮精則得之吾之所解口不能言蓋自得之妙
青出於藍而青於藍者矣必也圓機之士始能精到
若夫庸醫粗工急急於勢利者奪志分心雖未明諸
錯綜輕重之妙亦須於二十四道留意消息則不為
病隱而不為心惑也蓋脉之於病不能掩其惡得之
於手應之於心得之於心發言為辭脉病相應標本
相得病氣無不服古今脉訣精微言外之意則非道
弘人夫七表八裏九道二十四脉各主諸證此學者
之共知及乎浮洪相類弦緊似疑短與動同形結與
代俱止若非平日用意體認臨證未免自惑至如浮

而帶弦或數或如乳如實之緊之洪以至於長短虛促者皆陽也以其浮爲陽而帶諸陽也則所主諸證皆屬腑也乳實滑弦洪又帶如上脉氣者亦然也沉脉爲陰而帶諸陰脉象病在臟也必矣至若沉爲陰而帶諸陽則爲易治浮爲陽而帶諸陰則爲治也頗難故經云陰病見陽脉者生陽病見陰脉者死又於失血下利暴泄證內脉細則生脉大則死蓋細雖陰脉而生衰弱病勢既衰故曰生也經無明文學者不可不知大抵學診脉者如學切字切字者母隨韻轉而韻歸於母若欲切字須先認其三十六字母真的

則切天下之字未有不識者倘或道字不正則所切
皆訛矣切脉之法但體認二十四道脉形端的則於
諸錯綜之間自然心領意會若按圖索駿則畏首畏
尾妄意臆度則無繩墨譬如獵者詭遇雖日獲十禽
猶作者之所不取况司命之職乎百藝不精則不過
誤身惟醫不明脉則誤人性命或者三部九候尚不
知十二經證奚為暑證云脉虛弱者熱傷形而氣
消燦此言久病暑氣則然暴病暑氣之脉與熱病同
經不盡言不可但據經而疑證也况人之脉氣往往
不同長人脉長短人脉短瘦人脉露肥人脉深性偏

急者脉弦浮性明快者脉流利凶狠者脉勁實慈祥者脉和緩反此者不凶則吉不攝之人病輕脉重有養之士病重脉輕忠厚之脉往來調暢詭譎之脉乍浮乍沉其餘素稟暴變之不同指外盈虛消息鰕遊雀啄代止之脉故名死證須知痰氣關格者時復有之若非諳練駁歷未免依經斷病而貽笑大方也蓋病勢消爍殆盡者其氣不能相續而如鰕遊水動屋漏點滴而無常至者死脉也其或痰凝氣滯關格不通則其脉固有不動者有三兩路亂動時有時無者或尺寸一有一無者有關脉絕骨不見者或時動而

大小不常者有平居之人忽然而然者有素稟痰癖而不時而然者有僵仆暴中而然者皆非死脉也又岐伯曰必察四難而明告之者謂春得肺脉夏得腎脉秋得心脉冬得脾脉其至皆懸絕沉菴者命曰四逆又甲巳之歲二運南面論脉則寸在南而尺在北少陰司天兩寸不應少陰在泉兩尺不應乙丙丁戊庚辛壬癸之歲四運面北論脉則寸在北而尺在南少陰司天兩尺不應少陰在泉兩寸不應乃以南爲上北爲下正如男子面南受氣尺脉常弱女子面北受氣尺脉常盛之理同以其陰氣沉下故不應指也

六氣之位則少陰在中而厥陰居右太陰居左此不可易也其少陰則主兩寸尺厥陰司天在泉當在右故右不應太應司天在泉當在左故左不應依南政而論尺寸也若覆其手診之則陰沉於下反沉而濡細爲大故當知年之氣左右應見若不當沉而沉不當見而見故經云尺寸反者死陰陽交者死也有病熱而脉數按之不利乃寒盛格陽非熱證也有形證皆寒而脉氣鼓擊於拍下之盛者熱盛拒陰非寒證也又曰病在中脉實堅病在外脉不實堅皆不可治其餘斷病並無脉訣之法人能弘道得魚忘筌不惟

託身鳴家抑亦有處於采薪之憂也

論病

病之爲言猶言並也邪正並行於榮衛之間則爲病矣欲識其病先診六經察其表裏外六內七則風火暑濕燥寒之本定矣病者百疾之總名也六淫所侵者自腑而臟也七情鬱發者自臟而腑也病有專於表者有專於裏者有出入內外者大抵表裏卽陰陽陰陽卽臟腑臟腑卽榮衛榮衛卽血氣也血氣者正氣也病氣者邪氣也血氣不及者邪自外來則六淫之氣侵之血氣內使者七情諸證起矣故書云天作

華猶可違自作華不可違蓋七情者孰能使之無惟
智者制之而病常少而輕愚者縱之而病常多且重
故素問云上工治未病中工治已病已病者六淫外
感七情內侵六淫司天之時氣七情百病之所作氣
本病形各有經證未病者望聞問切知其病之將作
則迎而奪之也

泰定養生主論卷之六

泰定養生士

論證

證者正也百病之名也名正則言順不然則望一男子皆可以檢方用藥而何以醫爲蓋古之作者各自鳴家科目名義初無醫義後昆受授執以終身開卷瞭瞭對病還迷故古人有云不怕不會醫只怕不識證今所謂證何也乃素問六氣百病之機是也不識此者雖汗牛充棟之方不足以供一朝之用然則方

書無用乎孟子云吾於武城取二三策而已是故明
六氣推標本者臨病觀色聽聲切脉三五同參則五
運太過不及大氣司天民病仲景三百九十七法風
火暑濕燥寒之標本雜證得矣

論治

既明運氣標本陰陽虛實脉病與證則治在其中矣
岐伯曰病爲本醫爲標標本相得病氣無不服故五
臟則論曰拘於鬼神者不可與言至德惑於鍼石者
不可與言至巧雖親戚兄弟亦無如之何況夫氣煩
滔天聰明自用五神失位六賊內戕者不別賢愚薰

猶共器水炭同爐則吾何有於病哉是必六淫不侵
七情頻已聽信無惑鍼砭藥餌適宜而可以言治也
岐伯曰上古聖人雖作湯液備而不用中古以來道
德稍衰故服湯而愈病況今浮薄之世乎是以握病
機推標本者經云萬舉萬當據方藥迷標本者經云
是謂妄行蓋病者必謀於醫醫者必謀其術岐黃問
答醫之法也臨機應變醫之意也以意用法非妄意
也故望聞問切以知其內外淺深虛實而藏諸用則
四方中央之病於鍼砭藥灸按蹻之法正治反治標
本互施故經云此治之大體也若得其體則雖茆昔

可以瘳疾失其體則雖金玉亦不能愈病故桂枝承
氣誤投則虛者愈虛而實者愈實矣可不慎乎故當
臨病之時深窮表裏是久是新聞問詳曲病之内外
藥之汗下應病卽止不須過劑辛甘發散外邪酸苦
湧泄内病過則傷和未已者各依經證清利滲潤以
平爲得如脉靜人病内虛之故攻之則峻補之則熱
宜禁宜忌定志寧神屏好惡養陰陽飲食入胃則穀
氣乃生也觀夫貪婪之士冒險無厭神明已去形器
孤立當斯之時雖巫咸扣鼓和緩操鍼於治何補哉
孫真人云有亡國之政者危邦不入亂邦不居此也

墳素治法聖師答問反復詳備唯其詳備故逆順正
反之義散在諸篇久學尚有經疑驟觀則未有不望
涯而退者既無措手足之地則於是乎競趨於雜方
而以熱犯熱以寒犯寒而莫知逆從正反之妙也今
舉其要庶使釋然素問云春溫夏熱秋涼冬寒是謂
四順反此者謂之四逆三部九候之脈春弦夏洪秋
毛冬石謂之從反此者謂之逆以寒攻熱以熱攻寒
謂之逆治逆其病氣而名曰正治也以寒治寒以熱
治熱謂之從治從其病氣而名曰逆治也故熱不遠
熱者辛甘發散之陽治六腑之淺邪也酸苦湧泄爲

陰治五臟之深邪也熱因寒用者寒不納藥而熱劑
冷服也寒因熱用者熱勢拒寒而寒劑熱服也通因
通用者下利譏語脉實而數用大小承氣湯瀉結止
利也塞因塞用者胸滿惡食泄瀉脉虛而遲用辛甘
溫熱之劑開上補下也故曰其始則同其終則異可
使破積可使潰堅可使氣和可使必已病熱脉數而
按之不利者乃寒盛格陽則治以辛熱也形證皆寒
而脉氣鼓擊於指下之盛者爲熱盛拒陰則治以寒
涼也外似其從而內實逆治其餘四序治法熱無犯
熱寒無犯寒溫無犯溫涼無犯涼故寒者熱之熱者

寒之溫者涼之散者收之抑者散之燥者潤之急者
緩之堅者與之脆者堅之衰者補之强者瀉之岐伯
云亢則害承廼制制生則化外列盛衰害則敗亂生
化大病故知風病至極則似燥金之證而絛揭燥泄
熱病至極則似寒水之證而戰慄厥逆土病至極則
似風木之證而濕鬱熱發金病至極則似二火之證
而爲三消癰疽瘡瘍水病至極則似濕土之證而爲
胛腫肉泥故推本至標則知其元從標至本則識其
所承故醫不惑於證病不惑於藥則可與言治矣
故辯證在於六氣六氣在於六脉故曰內脉外色色

脉之道審察之要也除六經傷寒有標本化氣定法其餘風火暑濕燥寒並以六氣爲本百病爲標治標無翼其本治本必推其標以寒治熱之方寒藥爲君甘苦爲臣酸爲之使以熱治寒之方熱藥爲君甘溫爲臣苦辛爲使奇方君一臣二君二臣三大劑佐使至於七與九偶方君三臣六大劑佐使至於八與十補上治上奇偶方制以緩且少而數服補下奇偶方制以急且多而踈服急者氣味厚緩者氣味薄奇之不去則偶之偶之不去則反佐以取之故治熱以寒溫而行之治寒以熱涼而行之治溫以清涼

而行之治清以溫熱而行之以順病氣也汗藥不以
奇下藥不以偶取用古方者以此爲式對證族藥者
秘訣云君多臣半佐使者三之一寒溫熱涼有毒無
毒之藥各以對本氣者爲君佐君者爲臣應臣者爲
使此非本草藥性之君臣佐使也今更采集問病機
司屬六氣百病及處方對證之法用爲醫學通例

風屬本標

足厥陰風木肝膽之氣爲本

諸暴強直支痛痙矣裏急縮及諸瘳眩爲標

治法 經云風淫於內治以辛溫佐以苦以甘緩之

以辛散之

熱屬本標

手少陰君火之熱真心小腸之氣爲本

諸喘嘔吐酸暴注下迫轉筋小便渾濁諸脹腹大之
如鼓癰疽瘍疹瘤氣結咳吐下霍亂瘧腫脹鼻塞
衄衄血溢血泄淋閔身熱惡寒戰慄驚惑悲笑譫妄
衄衄血汗及諸痛痒瘡瘍爲標

治法 經云熱淫於內治以鹹寒佐以甘苦以酸收
之以苦發之

濕屬本標

足太陰濕土脾胃之氣爲本

諸瘕強直積飲痞膈中滿霍亂吐下體重肘腫肉如泥按之不起及諸濕腫滿爲標

治法 經云濕淫於內治以苦熱佐以酸淡以苦燥之以淡泄之

火屬本標

手少陽相火之熱心色絡三焦之氣爲本

諸熱瘡癰暴瘖冒昧躁擾狂越罵詈驚駭肘腫疼痠氣逆衝上禁慄如喪神守噤嘔瘡瘍喉痺耳鳴及龍耳嘔涌溢食不下目昧不明暴注瞶瘕暴死爲標

治法 經云火淫於內治以鹹冷佐以苦辛以酸收之以苦發之

燥屬本標

手太陰燥金肺與大腸之氣爲本

諸澁枯涸乾勁皴揭氣瞋鬱病痿爲標

治法 經云燥淫於內治以苦溫佐以甘辛以苦下之

寒屬本標

足少陰寒水腎與膀胱之氣爲本

諸病上下所出水澄澈清冷癥瘕癰疽堅痞膈滿急

痛下利清白食已不飢吐利腥穢屈伸不便厥逆禁固及諸寒收引爲標

治法 經云寒淫於內治以甘熱佐以苦辛以鹹瀉之以辛潤之以苦堅之

養主論卷之七

養主論卷之七